



Broj: 16-12-16-7783-~~21~~ /23
I. Sarajevo, 11.12.2023. godine

Na osnovu člana 8. stav (2) tačka h) Zakona o Državnoj agenciji za istrage i zaštitu ("Službeni glasnik BiH", br. 27/04, 63/04, 35/05, 49/09 i 40/12) i člana 69. stav (3) Zakona o javnim nabavkama ("Službeni glasnik BiH", br. 39/14 i 59/22), u otvorenom postupku javne nabavke rezervnih dijelova sa uslugom ugradnje, popravke i održavanja službenih vozila, direktor Državne agencije za istrage i zaštitu, d o n o s i

ODLUKU

o otkazivanju postupka javne nabavke za LOT 1

Član 1.

U postupku javne nabavke rezervnih dijelova sa uslugom ugradnje, popravke i održavanja službenih vozila za potrebe Državne agencije za istrage i zaštitu (daljem tekstu: Agencija), putem otvorenog postupka za dostavljanje ponuda, za koji je obavještenje o javnoj nabavci broj 1161-1-212-3-57/23 od 05.10.2023. godine objavljeno na Portalu javnih nabavki i u „Službenom glasniku BiH“, broj 71/23 od 13.10.2023. godine, otkazuje se postupak javne nabavke za LOT 1-Nabavka rezervnih dijelova sa uslugom ugradnje, popravke i održavanja službenih vozila Agencije marke Volkswagen, Škoda, Audi i Seat, na području Sarajeva, Ilidže, Vogošće, Istočnog Novog Sarajeva i Istočne Ilidže, na period od tri godine, iz razloga koji su izvan kontrole Agencije i koji se nisu mogli predvidjeti u vrijeme pokretanja postupka javne nabavke.

Član 2.

Ovom odlukom stavlja se van snage Odluka o izboru najpovoljnijeg ponuđača u postupku javne nabavke rezervnih dijelova sa uslugom ugradnje, popravke i održavanja službenih vozila za potrebe Agencije, broj 16-12-16-7783-15/23 od 07.11.2023. godine (u daljem tekstu: Odluka) kojom je, kao najpovoljniji ponuđač za LOT 1-Nabavka rezervnih dijelova sa uslugom ugradnje, popravke i održavanja službenih vozila Agencije marke Volkswagen, Škoda, Audi i Seat, na području Sarajeva, Ilidže, Vogošće, Istočnog Novog Sarajeva i Istočne Ilidže, na period od tri godine, izabran ponuđač „AUTODELTA” d.o.o. Sarajevo, ponuda broj 16-12-16-7783-5/23 od 31.10.2023. godine, za ponudenu cijenu u iznosu od 90.972,70 KM sa uključenim popustom od 30%, bez uračunatog PDV-a.

Član 3.

Ova odluka objavit će se na web stranici Agencije, istovremeno s upućivanjem ponuđačima koji su učestvovali u postupku javne nabavke.

Član 4.

Ova odluka stupa na snagu danom donošenja.

O b r a z l o ž e n j e

Odlukom broj 16-12-16-7783-1/23 od 29.09.2023. godine pokrenut je postupak javne nabavke rezervnih djelova sa uslugom ugradnje, popravke i održavanja službenih vozila Agencije, procijenjene vrijednosti 249.000,00 KM bez PDV-a, za koji je obavještenje o javnoj nabavci broj 1161-1-212-3-57/23 od 05.10.2023. godine objavljeno na Portalu javnih nabavki i u „Službenom glasniku BiH“, broj 71/23 od 13.10.2023. godine. Novčana sredstva za realizaciju navedene nabavke obezbijedena su u okviru budžetskih sredstava za 2023. godinu, a na osnovu Zakona o budžetu institucija Bosne i Hercegovine i međunarodnih obaveza Bosne i Hercegovine za 2023. godinu („Službeni glasnik BiH“, broj 22/23) i Dokumenta okvirnog budžeta 2024.-2026. godina. Za navedeni postupak javne nabavke predviđena je e-aukcija, u skladu sa odredbama Pravilnika o uslovima i načinu korištenja e-aukcije („Službeni glasnik BiH“, broj 66/16) (u daljem tekstu: Pravilnik), a postupak nabavke podijeljen je na pet lot-ova.

U toku predmetnog postupka javne nabavke, Komisija za nabavke za potrebe Agencije u 2023. godini, zaprimila je pristigle ponude, izvršila njihovo otvaranje, te izvršila pregled i ocjenu ponuda, a prema zahtjevima i kriterijima iz Tenderske dokumentacije.

Komisija je utvrdila da je ponuda ponuđača „AUTODELTA” d.o.o. Sarajevo za LOT-1, prihvatljiva i da ispunjavaju kvalifikacione uslove u pogledu lične sposobnosti, sposobnosti obavljanja profesionalne djelatnosti, ekonomske i finansijske sposobnosti, tehničke i profesionalne sposobnosti, kao i formalno-pravne uslove iz Tenderske dokumentacije.

Komisija nije zakazivala e-aukciju za LOT-1, u skladu sa članom 3. stav (3) Pravilnika, već je postupak javne nabavke za LOT-1 okončala u skladu sa članom 64. stav (1) tačka b) Zakona o javnim nabavkama („Službeni glasnik BiH”, br. 39/14 i 59/22) (u daljem tekstu: Zakon), primjenjujući kriterij najniže cijene iz tačke 21. Tenderske dokumentacije, nakon čega je donesena Odluka kojom se, kao najpovoljnijem ponuđaču za LOT 1-Nabavka rezervnih dijelova sa uslugom ugradnje, popravke i održavanja službenih vozila Agencije marke Volkswagen, Škoda, Audi i Seat, na području Sarajeva, Ilidže, Vogošće, Istočnog Novog Sarajeva i Istočne Ilidže, okvirni sporazum na period od tri godine, dodjeljuje ponuđaču „AUTODELTA” d.o.o. Sarajevo, ponuda broj 16-12-16-7783-5/23 od 31.10.2023. godine, za ponuđenu cijenu u iznosu od 90.972,70 KM sa uključenim popustom od 30% bez uračunatog PDV-a.

U toku detaljnog pregleda ponuda za sve lot-ove, odnosno cijene radnog sata servisa, a u cilju pripreme na realizaciji okvirnih sporazuma i mogućnosti nabavke rezervnih djelova sa uslugom ugradnje, popravke i održavanja službenih vozila Agencije koja čekaju popravku, izvršen je uvid u cijene radnog sata servisa ponuđača, kako slijedi:

„AUTODELTA” d.o.o. Sarajevo, ponuda za LOT 1, broj 100/2023 od 31.10.2023. godine

Tabela 1.25

Red broj	OPIS	Cijena bez PDV-a	Količina	Vrijednost bez PDV-a
1	2	3	4	5=kol.3xkol.4
VW Golf 7 TDI, Polo, VW Kombi T4,T5,T6 , Passat 2,0 TDI, Tiguan 20 TDI, VW Touareg 3,0, Škoda Octavia 1,9, Škoda Octavia A5, Škoda Yeti, Škoda Octavia 1.6, Škoda Rapid				
1	Dijagnostika kvara vozila	200,00	1	200,00
2	Štelovanje špure trapa	100,00	1	100,00
3	Radni sat servisa	450,00	1	450,00
Ukupno: Radovi bez PDV-a				750,00
PDV 17%				127,50
Ukupno:Radovi sa PDV-om				877,50

„KLIMACENTAR“ d.o.o. Sarajevo, ponuda za LOT 1, broj 10/10/2023 od 25.10.2023. godine

Tabela 1.25

Red broj	OPIS	Cijena bez PDV-a	Količina	Vrijednost bez PDV-a
1	2	3	4	5=kol.3xkol.4
VW Golf 7 TDI, Polo, VW Kombi T4,T5,T6, Passat 2,0 TDI, Tiguan 20 TDI, VW Touareg 3,0, Škoda Octavia 1,9, Škoda Octavia A5, Škoda Yeti, Škoda Octavia 1.6, Škoda Rapid				
1	Dijagnostika kvara vozila		1	34,19
2	Štelovanje špure trapa		1	29,91
3	Radni sat servisa		1	34,19
Ukupno: Radovi bez PDV-a				98,29
PDV 17%				16,70
Ukupno:Radovi sa PDV-om				114,99

„LADA AUTO“ d.o.o. Banja Luka, ponuda za LOT 5, broj 730/2023 od 27.10.2023. godine

Tabela 5.11.

Red broj	OPIS	Cijena bez PDV-a	Količina	Vrijednost bez PDV-a
1	2	3	4	5=kol.3xkol.4
VW Caddy, Golf, Tiguan, Fiat Ducato, Opel Astra, Hyundai Elantra, Citroën C5, Škoda Rapid, Fiat 500, Peugeot 301				
1	Dijagnostika kvara vozila	35,00	1	35,00
2	Štelovanje špure trapa	35,00	1	35,00
3	Radni sat servisa	35,00	1	35,00
Ukupno: Radovi bez PDV-a				105,00
PDV 17%				17,85
Ukupno:Radovi sa PDV-om				122,85

Očigledno je da je cijena radnog sata servisa „AUTODELTA” d.o.o. Sarajevo od 450,00 KM sa popustom od 30% što iznosi **315,00 KM** za jedan radni sat servisa, ne samo neočekivana već i nerealna, te sigurno nije ista za ostale korisnike usluga, a što je u suprotnosti sa odredbama Zakona o zaštiti potrošača u Bosni i Hercegovini („Sl. glasnik BiH“, br. 25/06 i 88/15) u kojim stoji da je „trgovac obavezan da prodaje proizvod, odnosno pruža uslugu potrošaču na način koji nije u suprotnosti s dobrim poslovnim običajima“, za šta se u ovom slučaju ne može reći da se radi o dobrim poslovnim običajima, odnosno „da je

obavezan da pruža usluge svim potrošačima pod istim uslovima“, koju obavezu izabrani ponuđač nije planirao ispoštovati, dajući naprijed navedenu cijenu radnog sata servisa **devet** puta veću od cijene drugih ponuđača za isti posao, odnosno uslugu.

U cilju razrješenja naprijed navedene situacije i pretpostavke da se radi o greški u pisanju (greške u imenima ili brojevima, pisanju ili računanju) da je trebalo da cijena jednog radnog sata servisa umjesto 450,00 KM, bude 45,00 KM, na poziv Agencije, dana 23.11.2023. godine, odazvao se predstavnik firme „AUTODELTA“ d.o.o. Sarajevo, Emir Ismailović. U prisustvu člana Komisije za nabavke i predstavnika Odsjeka za materijalno poslovanje, logistiku i održavanje Agencije, imenovani je izjavio da je navedena cijena radnog sata servisa od 450,00 KM sa popustom od 30% što iznosi 315,00 KM, što se tiče njih važeća i da će se takva i primjenjivati.

Imajući u vidu navedeno i činjenicu da se ponuđena cijena neće moći primjeniti, a da je Odluka već donesena, Agencija je ostvarila kontakte sa nadležnim institucijama (Pravobranilaštvo Bosne i Hercegovine, Agencija za javne nabavke) u cilju zakonitog nastavka predmetnog postupka. Nakon razgovora sa predstavnicima navedenih institucija zaključeno je da se radi o situaciji koja je nastala izvan kontrole Agencije i koja se nije mogla predvidjeti u vrijeme pokretanje postupka javne nabavke (istraživanje tržišta je pokazalo cijenu radnog sata servisa od 30,00-40,00 KM bez PDV), te da se ponuđena cijena od 315,00 KM za jedan radni sat servisa ne može prihvatiti obzirom da je ista visoka i da bi kao takva dovela do neefikasnog trošenja budžetskih sredstava, a što je u suprotnosti sa osnovnim principima Zakona.


Cijeneći naprijed navedeno, odlučeno je da se postupak javne nabavke za LOT-1 otkaže u skladu sa odredbom člana 69. stav (3) Zakona, kako je navedeno u članu 1. ove odluke.

Pouka o pravnom lijeku: Protiv ove odluke može se izjaviti žalba Uredu za razmatranje žalbi Bosne i Hercegovine, u roku od 10 dana od dana dostavljanja iste. Žalba se podnosi putem Državne agencije za istrage i zaštitu.

Na izjavljenu žalbu ponuđač je obavezan platiti naknadu u skladu sa članom 108. Zakona o javnim nabavkama i podzakonskim aktima.

DOSTAVLJENO:

- „AUTODELTA“ d.o.o.
Sarajevo;
- Sektoru za mat.-fin. poslove;
- a/a.



DIREKTOR
GLAVNI GENERALNI INSPEKTOR POLICIJE

Darko Čulum